

Bil. 18

Rabu

20 Julai 2022



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGKAL KELIMA
MESYUARAT KEDUA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Memohon untuk Semakan Semula Mata Pelajaran Sejarah sebagai Subjek Wajib Lulus Peringkat SPM**
- YB. Datuk Seri Panglima Wilfred Madius Tangau (*Tuaran*) (Halaman 1)
- **Isu Monyet Liar yang Semakin Hari Semakin Banyak di Taman-taman Perumahan**
- YB. Tuan Steven Choong Shiau Yoon (*Tebrau*) (Halaman 4)

MALAYSIA
KAMAR KHAS
PARLIMEN KEEMPAT BELAS
PENGGAL KELIMA
MESYUARAT KEDUA
Rabu, 20 Julai 2022

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Ramli bin Dato' Mohd Nor)
mempengerusikan Mesyuarat]*

UCAPAN DI BAWAH USUL
BERKENAAN PERKARA TADBIR KERAJAAN (P.M. 17)

**Memohon untuk Semakan Semula Mata Pelajaran
Sejarah sebagai Subjek Wajib Lulus Peringkat SPM**

2.34 ptg.

Datuk Seri Panglima Wilfred Madius Tangau [Tuaran]: Tuan Yang di-Pertua, Tuaran telah menerima aduan dan rintihan daripada Persatuan Ibu Bapa dan Guru (PIBG) serta juga individu, memohon agar dasar subjek sejarah wajib lulus peringkat spm dikaji semula. Mereka bimbang tentang masa depan ribuan generasi muda setelah gagal mendapat sijil SPM yang sangat ramai seperti yang ditunjukkan dalam keputusan peperiksaan SPM bagi tahun 2017 hingga 2021.

Tahun	Jumlah Gagal (orang)
2017	58,690
2018	36,136
2019	46,732
2020	39,175
2021	45,514

Subjek Sejarah telah dijadikan subjek wajib lulus SPM pada tahun 2013 yang diiringi dengan pengenalan Kertas 3 yang membolehkan pelajar membuat rujukan sebulan lebih awal dan membawa bahan rujukan ke dalam bilik peperiksaan. Kertas 3 ini telah dimansuhkan pada tahun 2021.

Para ibu bapa juga risau tentang peperiksaan ulangan yang akan menggunakan sukatan Kurikulum Standard Sekolah Menengah (KSSM) bermula tahun 2022 iaitu tahun ini. Pasti, kohort KBSM tidak akan dapat menjawab soalan yang menggunakan sukatan dan buku teks yang baharu.

Tuaran mencadangkan agar subjek ini kekal wajib diambil oleh semua pelajar tetapi wajib lulus itu perlu disemak semula. Sekiranya persoalan patriotisme menjadi sebab subjek sejarah menjadi wajib, unsur patriotisme ini hendaklah juga diajar merentas kurikulum seperti dalam subjek Bahasa Melayu, Bahasa Inggeris, Pendidikan Moral dan subjek-subjek lain.

Kerajaan harus mengkaji, ke manakah ribuan anak-anak yang gagal mendapat sijil SPM tersebut? Tentunya kegagalan itu bukanlah kerana mereka tidak mempunyai perasaan cinta negara. Ibu bapa sangat berharap agar anak-anak mereka tamat SPM dengan sijil selepas 11 tahun di bangku sekolah kerana PT3 juga telah dimansuhkan.

Oleh yang demikian, Tuaran mencadangkan agar dasar subjek Sejarah sebagai subjek wajib lulus untuk layak mendapat sijil SPM dikaji semula. Sekiranya perkara ini perlu diteruskan, banyak perkara harus diambil perhatian. Ini termasuk masa mengajar guru, kaedah penaksiran, sukatan pelajaran dan kandungan serta fakta yang dimasukkan dalam buku-buku teks Sejarah.

Ketika ini, hanya 64 jam setahun mengajar subjek Sejarah berbanding 128 jam untuk Bahasa Melayu sedangkan, kedua-dua subjek wajib untuk layak dapat Sijil Kelulusan SPM. Tuaran juga mencadangkan supaya buku teks Sejarah yang ada sekarang ditulis semula oleh satu pasukan pakar sejarah yang terdiri daripada sarjana berbilang kaum yang mewakili Wilayah Sabah, Wilayah Sarawak dan Semenanjung. Terima kasih.

2.38 ptg.

Timbalan Menteri Pendidikan I [Dato' Dr. Mah Hang Soon]: Terima kasih kepada Yang Berhormat Tuaran. Tuan Yang di-Pertua, Kementerian Pendidikan Malaysia (KPM) memaklumkan bahawa mata pelajaran Sejarah merupakan mata pelajaran teras yang wajib dipelajari oleh semua murid mulai Tahun 4, pada peringkat rendah sebelum dipelajari secara lebih mendalam pada peringkat menengah. Kurikulum Standard Sekolah Menengah (KSSM) bagi mata pelajaran Sejarah, bermatlamat untuk memberi kefahaman mengenai masyarakat, negara Malaysia dan dunia. Usaha ini dapat memupuk dan memperkukuh identiti diri sebagai warganegara Malaysia yang arif dan peka sejarah serta cinta akan negara.

Mulai tahun 2013, mata pelajaran Sejarah dijadikan sebagai mata pelajaran wajib lulus pada peringkat Sijil Pelajaran Malaysia (SPM). Untuk makluman Ahli Yang Berhormat, jumlah calon yang gagal mata pelajaran Sejarah SPM adalah seramai 58,407 atau bersamaan dengan 14.1 peratus pada tahun 2017; 48,554 atau 12.5 peratus pada tahun 2018, 46,550 atau 12.1 peratus pada tahun 2019, 38,831 atau 10.2 peratus pada tahun 2020 dan 39,470 atau 10.4 peratus pada tahun 2021.

KPM prihatin akan calon yang tidak lulus mata pelajaran Sejarah SPM. Justeru, bagi calon tersebut, mereka boleh menduduki peperiksaan SPM Ulangan (SPMU) yang dilaksanakan pada setiap tahun. SPMU menawarkan tiga mata pelajaran, iaitu Bahasa Melayu, Sejarah dan Matematik.

Untuk tahun ini, SPMU akan dilaksanakan pada bulan September. Selain daripada itu, calon juga boleh menduduki peperiksaan SPM sebagai calon persendirian pada tahun-tahun berikutnya. Keputusan ini boleh digabungkan dalam satu sijil peperiksaan melalui perkhidmatan *patching* sijil peperiksaan SPM.

Calon yang telah memperoleh sijil SPM kali pertama mulai tahun 2009, layak untuk memohon perkhidmatan ini. Dengan cara ini, calon masih berpeluang untuk mendapatkan sijil SPM atau memperbaiki keputusan mereka.

Untuk makluman Ahli Yang Berhormat, bagi membantu calon menguasai mata pelajaran Sejarah dalam peperiksaan SPM, KPM memastikan kualiti

pedagogi dan pengetahuan guru mata pelajaran Sejarah sentiasa dipertingkatkan melalui pembangunan profesionalisme yang berterusan.

Di samping itu, KPM juga menyediakan pelbagai bahan sokongan dalam bentuk bercetak dan digital. Bahan yang boleh diakses melalui pelantar DELiMa dan repositori SumberKU adalah termasuk:

- (i) nota komprehensif bagi setiap bab yang merangkumi ringkasan bab, nota penuh, latihan kemahiran berfikir aras tinggi (KBAT) berbentuk esei pendek, latihan objektif dan latihan struktur;
- (ii) latihan pengukuhan bagi setiap bab yang lebih komprehensif merangkumi ringkasan bab, latihan KBAT (Esei Pendek), latihan objektif dan latihan struktur;
- (iii) Modul Latihan Objektif Berpandu untuk mata pelajaran Sejarah bagi setiap bab Tingkatan 4 dan Tingkatan 5 berserta skema jawapan; dan
- (iv) Modul Lonjakan SPM Sejarah merangkumi set soalan berformatkan SPM berserta skema jawapan.

Selain itu, KPM juga telah melaksanakan beberapa program sokongan, antaranya:

- (i) perkongsian video pendek sebagai bahan sokongan PdP mata pelajaran Sejarah yang boleh diakses di portal melalui kerjasama dengan Arkib Negara Malaysia dan Jabatan Muzium Malaysia; dan
- (ii) kerjasama antara KPM dengan Perpustakaan Negara Malaysia (u-Pustaka) melalui penggunaan portal E-pembelajaran untuk kelas tuisyen secara dalam talian yang dibangunkan oleh Sasbadi Online.

KPM akan terus mengukuhkan usaha dalam melaksanakan intervensi khusus bagi meningkatkan minat dan pemahaman murid dalam mata pelajaran Sejarah. Seperti mana Ahli Yang Berhormat sedia maklum, mata pelajaran Sejarah dijadikan sebagai mata pelajaran wajib lulus bermula tahun 2013. KPM tidak bercadang untuk memansuhkan mata pelajaran Sejarah sebagai wajib lulus dalam peperiksaan SPM.

Berkaitan dengan kurikulum dan buku teks mata pelajaran Sejarah, KPM ingin menjelaskan bahawa penggubalan kurikulum Sejarah adalah berasaskan Standard Kurikulum Kebangsaan. Kandungan kurikulum ini diterjemahkan dalam buku teks Sejarah secara khusus daripada segi nama tokoh, tempat, peristiwa, masa dan lain-lain mengikut garis masa peristiwa sejarah negara.

Fakta sejarah dalam buku teks Sejarah ini telah diteliti, disemak dan dikawal mutu kesahihannya oleh Panel Pakar Rujuk Kurikulum Sejarah dan Buku Teks Sejarah KPM. Panel ini terdiri daripada pensyarah sejarah yang mempunyai kepakaran daripada pelbagai latar belakang disiplin ilmu sejarah, akademik, universiti dan kaum. Panel pakar ini telah memastikan fakta sejarah negara dalam penulisan buku teks Sejarah KPM adalah tepat dan benar berdasarkan sumber dan bahan sejarah yang sebenar.

KPM komited untuk memastikan semua calon SPM bukan sahaja lulus mata pelajaran Sejarah dalam peperiksaan SPM, malah mampu memahami dan

menghayati elemen kewarganegaraan dan nilai sivik seperti yang dihasratkan dalam kurikulum kebangsaan. Sekian, terima kasih.

Isu Monyet Liar yang Semakin Hari Semakin Banyak di Taman-taman Perumahan

2.46 ptg.

Tuan Steven Choong Shiau Yoon [Tebrau]: Yang Berhormat Tuan Yang di-Pertua, Yang Berhormat Timbalan Menteri Tenaga dan Sumber Asli, saya ingin menyampaikan kebimbangan penduduk berhubung kehadiran monyet liar di taman perumahan di Parlimen Tebrau yang semakin berani mencuri makanan dengan memasuki rumah penduduk.

Tong sampah habis diselongkar, sisa makanan dan lebihan sampah lain dibaling begitu sahaja di jalan-jalan utama. Monyet-monyet ini pula akan mula menyerang penduduk apabila tidak mendapat makanan.

Kehadiran banyak monyet-monyet liar ini berikutan faktor pembangunan dan pembukaan kawasan hutan berhampiran kawasan perumahan yang menyebabkan habitat monyet semakin mengecil. Keadaan itu sukar dikawal berikutan bilangan monyet yang membuat kacau terlalu banyak hingga mencecah ratusan ekor.

Selain daripada itu, aktiviti memberi makanan kepada monyet-monyet liar juga mengubah perlakuan monyet tersebut dengan bergantung kepada manusia untuk mendapatkan makanan. Ia juga akan menghilangkan rasa takut monyet terhadap manusia.

Sehubungan itu, saya memohon tindakan tangkap-pindah diambil terhadap monyet-monyet liar yang mengganggu di kawasan perumahan dan dipindahkan ke habitat yang lebih luas dan sesuai. Tindakan penghapusan secara tembak mati atau tangkap-hapus secara *humane*, saya tegaskan perlu dijalankan terhadap monyet-monyet liar yang agresif atau telah mula menyerang manusia. Semoga permohonan rakyat di Parlimen Tebrau dapat dipertimbangkan. Terima kasih.

2.48 ptg.

Timbalan Menteri Tenaga dan Sumber Asli [Datuk Ali anak Biju]: Terima kasih Tuan Yang di-Pertua. Terima kasih Yang Berhormat Tebrau. Tuan Yang di-Pertua, sebanyak 437 aduan gangguan kera ke atas orang ramai direkodkan bagi negeri Johor pada bulan Januari hingga Mei 2022. Daripada jumlah tersebut, sebanyak 156 aduan direkodkan di daerah Johor Bahru, Johor dan 27 aduan direkodkan bagi Parlimen Tebrau.

Pelbagai tindakan telah diambil oleh Kementerian Tenaga dan Sumber Asli (KeTSA) melalui Jabatan Perlindungan Hidupan Liar dan Taman Negara (PERHILITAN) Semenanjung Malaysia untuk menangani konflik manusia dan kera melalui langkah jangka pendek dan jangka panjang. Langkah-langkah jangka pendek yang telah dilaksanakan sepanjang tahun adalah seperti berikut:

- (i) memasang perangkap kera di setiap kawasan aduan. Bagi tahun 2022, Jabatan PERHILITAN telah memasang dan menguruskan sebanyak 63 buah perangkap kera di daerah Johor Bahru;

- (ii) menjalankan Program Penakaian Populasi (*culling*) bagi mengurangkan populasi kera bagi kera-kera yang mengancam keselamatan penduduk. Berdasarkan rekod, sebanyak 999 ekor kera telah dilupuskan di negeri Johor bagi tempoh Januari hingga Mei 2022. Untuk Parlimen Tebrau, 46 ekor kera telah dilupuskan. Bagi keseluruhan daerah Johor Bahru sebanyak 9,559 ekor kera telah dilupuskan dari tahun 2018 hingga bulan Mei 2022; dan
- (iii) menjalankan 57 operasi kawalan musuh tanaman bagi mengurangkan konflik manusia dan kera di kawasan ini bermula Januari hingga Jun 2022.

Antara tindakan jangka panjang bagi membendung peningkatan konflik manusia dan kera pula adalah seperti berikut:

- (i) meningkatkan kekerapan operasi penakaian kera secara berkala, setiap bulan diadakan;
- (ii) meningkatkan libat urus dengan komuniti bagi menerangkan langkah-langkah mencegah konflik kera melalui pengurusan sisa pepejal dan penjelasan larangan memberi makan kepada kera;
- (iii) mengadakan siri perbincangan dengan Kerajaan Negeri dan Exco Pelancongan, Alam Sekitar, Warisan dan Budaya serta pihak berkuasa tempatan (PBT) bagi menggubal peruntukan undang-undang peraturan kecil untuk menghalang orang ramai memberi makan kepada kera;
- (iv) mengadakan perbincangan dengan pihak perkhidmatan pengurusan sisa pepejal oleh kontraktor yang dilantik supaya lebih efisien dengan menyediakan kemudahan tong sampah kalis kera (*monkey-proof bin*);
- (v) meningkatkan kerjasama antara jabatan, agensi Persekutuan dan negeri bagi memastikan maklumat, isu-isu dan masalah pembukaan kawasan dapat diteliti dan ditangani secara bersama;
- (vi) Jabatan PERHILITAN Negeri dilibatkan sebagai ahli jawatankuasa teknikal bagi memberikan khidmat nasihat teknikal sebelum sesuatu permohonan pembukaan kawasan yang mempunyai populasi kera diluluskan;
- (vii) menambah bilangan papan tanda larangan memberi makan kera di kawasan konflik. Pada masa ini, terdapat hanya dua papan tanda yang telah dipasang di kawasan Tanjung Piai dan Lake Garden Seri Alam – So, ini kita perlu perbanyakkan lagi; dan
- (viii) Jabatan PERHILITAN mencadangkan penambahan bilangan perangkap kera di kawasan konflik bagi membendung konflik manusia-kera. Dalam hal ini, Jabatan PERHILITAN memohon kerjasama daripada kerajaan negeri menyediakan peruntukan bagi membantu Jabatan PERHILITAN menambah kapasiti bilangan perangkap kera

kerana peruntukan sedia ada di peringkat Jabatan PERHILITAN agak terhad.

Semoga usaha kerjasama ini akan meningkatkan keberkesanan usaha-usaha membendung konflik tersebut. Pada masa ini, sebanyak 63 perangkap di daerah Johor Bahru perangkap kera telah dipasang di kawasan tersebut. Sekian, terima kasih.

Dato' Ramli bin Dato' Mohd Nor [Cameron Highlands]: Sebelum saya akhiri sesi ini, *just out of curiosity*, Yang Berhormat Menteri, *did you receive any objection from the activist of animal protection?*

Datuk Ali anak Biju: Memang ada. Terutama cara kita *culling* kera itu, memang ada. Jadi, kita kena hadapi secara berhemahlah macam mana kita hendak menentukan konflik ini boleh kita tangani secara *win-win situation*. Ini kerana, ada yang dilaporkan di akhbar yang kita *culling* monyet ini tetapi monyet itu memang ganas pun. Jadi ini adalah salah satu daripada isu yang kita hendak terangkan semasa membuat dialog-dialog libat urus tersebut yang saya ketengahkan tadi.

Populasi kera memang semakin bertambah mengikut rekod yang kita ada. Kebanyakan kera ini pergi ke kawasan manusia. Sebenarnya, mereka tertarik dengan makanan yang kita ada itu. Ini kerana, makanan manusia ini lebih banyak khasiat. Jadi, lebih banyak khasiat jadi makanan dia lebih bermutu. Jadi, populasi kera pun bertambah. Beranak banyak lagi. *[Ketawa]*

Jadi dia macam *chicken and eggs situation* yang mana satu – Jadi, terima kasih Tuan Yang di-Pertua. Terima kasih Yang Berhormat Tebrau. Saya rasa Yang Berhormat Tebrau kalau ada apa-apa isu berhubungan kera ini boleh hubungi Jabatan PERHILITAN ataupun boleh *text* saya *direct*, Yang Berhormat Tebrau. Terima kasih Yang Berhormat Tebrau.

Dato' Ramli bin Dato' Mohd Nor [Cameron Highlands]: Ahli-ahli Yang Berhormat, Mesyuarat Kamar Khas hari ini ditangguhkan sehingga hari Khamis, 21 Julai 2022, jam 2.30 petang. Terima kasih.

[Kamar Khas ditangguhkan pada pukul 2.56 petang]